

zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

Iruñeko espetxezaintzako epaile andreaki

Susana Ubani • IRUÑEA

Epaile andrea, zuk ez dakizun zer kontatuko dizut Bautista Barandallaren gaixotasunari buruz? Izan ere, zerbaitetan interesa erakutsi baldin baduzu, txostenak behin eta berriz eskatzean izan da, bildumagilea izanen bazina bezala.

Suposatzen dut orain ebakuntzaren txostenaren zain izanen zarela irrikan, eta gero ebakuntzaren ondorengoa eskatuko duzu, azkenik, ebakuntzaren ondorengo ebaluazioa eskatzeko, eta abar. Zenbat txosten gehiago beharko ote duzu zeure bilduma osatzeko?

Ez al da nahikoa zuretzat jakitea inongo txostenek ez duela aldatuko Bautista-

ren eritasun larri eta sendaezina? Ez al da, bada, horrexegatik, hain zuzen ere, edozein presok askatasun eskubidea duela, 92. artikulua arabera? Zerk egiten du Bautista ezberdin?

Epaile andrea, beti honako hauxe entzun dut: «Nahi izatea ahal izatea da». Eta suposatzen dut, are gehiago oraindik, bostere judizialaren ordezkaria izanik, zerori bezala.

Nahi ezazu, epaile andrea!

Aspalditik negarrez

Pilar Mitxelena • HERNANI

Hainbeste maite dugun herri hau aspaldian dago negarrez, ez bakarrik pasa den larunbatetik, ez eta Ermuko gazte hura hil zutenetik ere, askok adierazi nahi duten mo-

duan, ez horixe. Oraindik gogoan dut, 15 urtetik gora diren arren, nola Hernaniko ama batek esan zuen herriko bikarioaren aurrean, bere semea GALEkoek hil zutenean, negar malko isilen artean: «Gurea izango al da azkenekoa, ezin izango nuke beste hildako bat jasan, edozeinena dela ere», eta negarrez burua gorde zuen. «Handia zara zu — esan zion apaizak — semearen bizia eskaintzen duzunean herri honek bakea izan dezan». Ama hura ere hil zen. Ez zuen Euskal Herrian bakerik ezagutu. Ez zen egunkarietan atera, beste hainbeste atera ez diren bezalaxe, gurea ez da protagonista izatea. Badiara gure herrian kartzelara eramanez eta hiltzeraino jipoitutakoak, eta gero amari eka-riak ere bai, baina ez ziren egunkarietan haien saminak azaldu, isilik eramanez zuten; orain haiei eta kartzelan dauden senideei

hiltzaile deitzen diete; ama haiek, anaia haiek hiltzaileak?

EITBko *Politicamente incorrecto* programan horixe entzun nion hizlari bati; alegia, Senideak, kale borroka, Jarrai eta abar, guztiak dira ETA, eta jakina etxetik entzuten duenari isilik egotea besterik ez dagokio. Beste batek zioen beraiek hiltzaileak behintzat ez direla, eta harantzaxeagotik beste batek, balio etiko eta moralak direla hemen landu behar direnak, eta horrekin batera Andoaingo alkatea bidali egin behar dela zentsura mozio baten bidez, atentatu baten inguruan ez delako mintzatu, isilik egon delako; eta beraiek esaten dutena onartzen ez duenak ez duela bakearen alde ezer egin nahi ere bazioen.

Ai! adiskide, isilik paseak ditugu asko; zorritzarrez, gehiegi.

montxo



galdeiozu... ?

hirusta



Garai batean EGUNKARIAN zutabeak idazten zenituen. Oraindik jarraitzen al duzu idazten?

Xabier Aranburu (Azpeitia)

NAGORE ARANBURU

Aktorea

Zutabeak dagoeneko ez, baina ez diot utzi idazteari. Telebistarako eta antzerkirako gidoiekin nabil lanean azken aldian. Antzeztea bezainbeste gustatzen zait paperean istorioak asmatzea. Eta hortxe nabil, pixkanaka-pixkanaka ikasten!



Fredi Paia

PNV=ETA

Hau da espainiar nazionalismoak azken urteetan egin duen politikaren garapen logikoa. Jeltzaleek (ezin zitekeen bestela) arin azpimarratu dituzte erakunde armatuarekiko dituzten ezberdintasunak; taktika, estrategia eta metodoari dagokionez. Agian, zenbaitentzako, harritzeko modukoa izan da espainiarrek bereganatu duten leloa. Baina erraz uler daiteke, historia hurbilari gainbegiratu gero. (Soziologiaren akolito sabindarrek aspaldi egin ez dutena).

Basta Ya! bezalako talde *bakezaleek* (eufemismo kurioa inposaketa militarrean oinarritutako status politikoari eutsi beste helbururik ez duten horientzat) Bertold Brechen poema bat erabili izan dute maiz (idazle komunistaren ondarearen lorrintzeko). Olerkian, errepresioaren dinamika salatzen du autoreak. Errepresioari erantzuteko norberari tokatu arte itxaroten due-

narentzat azken momentuan konturatzea alferrik dela diosku Brechek. EAJrena larriagoa da, laguntza osoa eskaini izan dion estrategia batean harrapatuta geratu delako. Erromak ez baitie traidoreei ordaintzen. Edo ez ote ziren EAJkoak Jarrai eta kale borroka gauza bera zirela lau haitzara zabaltzen zutenak? Ez al du isolamenduan oinarritutako bere eguneroko politikak Batasuna ETArek zati den teoria praktikaren bidez justifikatu? Ajuria Eneako baratzean erein zituzten hazien fruituak dira oraingoak. Aitzitik, baietz errentagarritasun politikoa atera honi ere. EAJren diskurtso guztia mutur bietan dauden erradikalen biktima direla saltzea delako. Benetako biktima ez diren bakarrak izan arren.

Halako malabarismotan jardutera behartuta dago auzokideak atxilotu, Arkauten torturatu, espetxeratu, sakabanatu.... eta frankista berriekin zein GALEn sortzaileekin afaltzen duena.

Otsailaren 18tik aurrera **Juantxo Lopez Uralde • Greenpeaceko Espainiako arduraduna** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com